

五經同卷



清刻龍藏佛說法變相圖

五經同卷

佛說大乘百福相經

佛說大乘百福莊嚴相經

佛說大乘四法經

佛說菩薩修行四法經

佛說希有校量功德經

良四

佛說大乘百福相經

唐中天竺三藏地婆訶羅奉勅譯

如是我聞一時佛在舍衛國普妙宮中坐寶
莊嚴師子之座與大比丘僧千二百五十人
俱菩薩摩訶薩無央數眾恭敬圍遶瞻仰尊

顏身心不動爾時文殊師利菩薩於大眾中
承佛威神從座而起偏袒右肩右膝著地合
掌向佛而作是言世尊一切衆生根性差別
欲樂不同如來一音隨類演說種種無量咸
蒙利益如是所說大法言音皆以如來福德
成就何等名爲如來福德所言福德其量云
何惟願爲我解說其義饒益無數百千衆生
爾時世尊告文殊師利菩薩言善男子汝已
超過聲聞及辟支佛能以大慧大悲請問如
來如是之義諦聽諦聽善思念之吾當爲汝

分別解說文殊師利假使閻浮提一切衆生
行十善道所有福德總爲一聚如是積數滿
百千倍成一轉輪聖王福德之量文殊師利
轉輪聖王成就七寶具足千子何謂七寶一
者金輪寶二者象寶三者馬寶四者珠寶五

者女寶六者主藏寶七者主兵寶千子皆悉
端正勇健能伏怨敵如是名爲轉輪聖王所
有福德文殊師利假使四天下一切衆生皆
悉成就轉輪聖王所有福德如是積數滿百
千倍成一帝釋福德之量文殊師利假使四
天下一切衆生皆悉成就帝釋所有福德如
是積數滿百千倍成一第六他化自在天王
福德之量文殊師利假使四天下一切衆生
皆悉成就魔王福德如是積數滿百千倍成
一小千世界主初禪梵王福德之量文殊師
利假使小千世界一切衆生皆悉成就初禪
梵王所有福德如是積數滿百千倍成一中
千世界土二禪梵王福德之量文殊師利假
使中千世界一切衆生皆悉成就二禪梵王
所有福德如是積數滿百千倍成一三千大

千世界主第四禪梵王魔醯首羅福德之量
文殊師利魔醯首羅有大福德有大智慧有
大威神非少善根而得成就何以故如劫燒
已將更成立於第四禪降注大雨經五中劫
其水積滿三千大千上至梵世一一雨滴魔

醯首羅悉能知之文殊師利假使三千大千
世界一切衆生皆悉成就魔醯首羅所有福
德如是積數滿百千倍成一獨出辟支福德
之量文殊師利且置如是三千世界假使十
方諸佛國土一切衆生皆悉成就辟支所有

良四

三

福德如是積數乃至無量無邊億百千倍成
一最後身菩薩福德之量文殊師利如是最
後身菩薩及十方盡虛空界一切衆生卵生
胎生濕生化生有色無色有想無想非有想
非無想如是等衆生皆悉成就最後身菩薩

所有福德如是積數乃至無量無邊億百千
倍成如來身一毛孔中福德之量文殊師利
當知如來身諸毛孔其數正有九十九億一
一皆具無量福德如上所說文殊師利諸佛
如來一一毛孔所有福德乃至積數無量無
邊億百千倍以是福德成如來身一隨好福
文殊師利如是佛身所有隨好略說其數有
八十種一者肉髻高顯無能見頂二者鼻高
脩直孔不外見三者眉如初月又紺青色四
者耳輪埵成五者身堅如那羅延六者骨節
相連如鈎鎖七者行時去地四寸印文成就
八者身迴如象王九者甲如赤銅薄而光澤
十者膝骨圓好十一者身常鮮潔十二者膚
體系軟十三者身體端直十四者手指纖長
十五者指文嚴麗十六者筋脉潛隱十七者

身色潤好十八者踝不露現十九者身不透
迤二十者身相圓滿二十一者識清淨二十
二者威儀備足二十三者住處安隱無能動
搖二十四者威振一切二十五者衆生樂見
二十六者面不狹長二十七者容色不撓二
十八者面相姝廣二十九者脣色如頻婆果
三十者音聲深遠三十一者齋深圓好三十
二者齋分右旋三十三者手足圓滿三十四
者手足從心所作三十五者手足文明徹三
十六者手足文不斷三十七者手足光有五
彩三十八者衆生見皆喜悅三十九者面如
滿月四十者先意與語四十一者毛孔出無
上香四十二者足下平滿四十三者威容如
師子王四十四者進止如象王四十五者行
步如鵝王四十六者首如摩陀那四十七者

身極端正四十八者一切聲相具足四十九
者牙利鮮白五十者舌色如赤銅五十一者
舌薄而長五十二者諸根清淨五十三者身
色光潔五十四者手足潤澤五十五者手足
有德相五十六者面門相具五十七者手足
掌如紅蓮五十八者腹不現五十九者齋不
出六十者腰細稱形六十一者身毛上靡六
十二者身持重六十三者臆前有室利婆瑳
像六十四者身相洪大六十五者手足柔輭
六十六者圓光一尋六十七者常光照身六
十八者等視衆生六十九者不輕衆生七十
者應衆生音聲不增不減七十一者說法不
著七十二者一音普徧同衆生語七十三者
說法有因緣七十四者一切衆生無能盡觀
七十五者行順於右七十六者無瞋狀七十

七者髮長好七十八者髮不亂七十九者髮
右旋八十者髮青紺文殊師利如上所說名
爲如來隨好福德積數滿足無量無邊億百
千倍成如來身隨相一文福德之量如是隨
相復有八十一者梵王像二者帝釋像三者
提頭賴吒像四者毗樓勒叉像五者毗樓博
叉像六者毗沙門像七者水天像八者日天
像九者月天像十者火天像十一者風天像
十二者龍王像十三者仙人像十四者童男
像十五者童女像十六者賢座像十七者寶
幢像十八者牛王像十九者功德天女像二
十者山王像二十一者摩竭大魚像二十二
者金翅鳥王像二十三耆彪王像二十四者
馬王像二十五者孔雀王像二十六者共命
鳥像二十七者迦陵頻伽像二十八者翡翠

像二十九者鸚鵡像三十者蹠俱羅鳥像三
十一者鵝王像三十二者鳩鵲像三十三者
象王像三十四者宮殿像三十五者摩尼珠
像三十六者瓔珞像三十七者大海像三十
八者蓮華像三十九者難陀跋多像四十者
浴池像四十一者靈茅像四十二者薩底迦
像四十三者華鬘像四十四者寶冠像四十
五者尸利婆堽像四十六者傘蓋像四十七
者江河像四十八者雲天像四十九者寶劍
像五十者長鉤像五十一者頻婆果樹像五
十二者指環像五十三者耳璫像五十四者
金剛杵像五十五者戈戟像五十六者矛稍
像五十七者長刀像五十八者鬪輪像五十
九者弓矢像六十者鉞斧像六十一者罽索
像六十二者耜耜像六十三者藥草像六十

四者乳牛像六十五者野牛像六十六者殺
羊像六十七者白拂像六十八者天鼓像六
十九者金椎像七十者商佉像七十一者寶
鏡像七十二者大龜像七十三者種刃像七
十四者華瓶像七十五者粉米像七十六者
華樹像七十七者果樹像七十八者鴈王像
七十九者輪中師子像八十者鹿王像文殊
師利如上所說名爲如來隨相福德積數滿
足無量無邊億百千倍合成如來身之一相
如來身相有三十二一者足下安平二者手
足千輻輪網三者手足指纖長四者手足柔
軟如兜羅綿五者足跟滿好六者手足指網
縵七者足趺高平與跟相稱八者蹲踞長如
伊尼鹿王九者平身端立垂手過膝十者陰
藏不現十一者身縱廣等如尼拘陀樹十二

者一毛孔有一毛生十三者身毛上靡青色
柔輭而右旋十四者身色微妙勝閻浮金十
五者身光一丈十六者皮薄細滑不受塵垢
十七者兩肩圓好十八者身廣端正十九者
臆如師子王二十者兩腋下滿二十一者牙
白而大二十二者四十齒二十三齒白齊
密而根深二十四者七處滿足二十五者方
頰如師子王二十六者味中得上味咽中二
處津液流出二十七者舌軟薄能覆面至髮
際二十八者梵音深遠如迦陵伽二十九者
眼如優鉢羅華三十者眼睫如牛王三十一
者眉間白毫色如珂雪三十二者頂肉骨成
文殊師利如是所說名爲如來三十二相所
有福德積數滿足無量無邊阿僧祇不可度
量不可思議不可說倍合成如來大法言音

文殊師利如是諸佛大法言音能被無量無邊阿僧祇世界一切衆生意樂差別隨其類解說法教化文殊師利諸佛如來所有言音具足如是無量功德普徧世界利益衆生亦復如是文殊師利如上所說福德之量不可思議不與聲聞辟支佛共何以故如是福德從施戒修大悲大慧方便力等諸功德生是故不與聲聞辟支佛共文殊師利有二種法生如來身何等爲二一者勝願力二者方便力以此二法生如來身乃至音聲相好說法所行皆從二因而得成就文殊師利如來爲欲憐愍利益安樂諸衆生故出現於世而諸衆生若干種性欲樂不同隨其差別現種種相說法教化示其所行得入佛法爾時文殊師利菩薩聞佛所說諸功德已白佛言世尊

我於今者得大善利能知如來爲無等等爲無上上爲諸衆生作大依止清淨無染猶如虛空我今得值甚爲希有佛說是經已文殊師利菩薩等并諸比丘合掌信受歡喜奉行佛說大乘百福相經